

四庫全書

史部

欽定四庫全書

欽定續文獻通考卷五十九

職官考

諸行宮官屬

宋高宗紹興四年十月以孟庾為行宮留守

互見留守司門

臣等謹按馬端臨考不載行宮官屬而留守門內

有云武林建業並建行宮叅知政事孟庾為留守從權措置百司事務即是年事也又云紹興六年

八月三省已降指揮三省樞密院常程事務並聽
行宮留守司與決蓋所可見者僅如此

遼北面宮官

諸行宮都部署院總契丹漢人諸行宮之事官有諸
行宮都部署知行宮諸部署司事副部署諸行宮判
官契丹行宮諸部署司總行在行軍諸鄂爾多之政
令官有都部署知都部署事副部署契丹行宮判官
行宮諸部署司掌行在諸宮之政令官有行宮都部

署副部署部署判官

十二官官有宮使副使太師太保侍中

太宗會同元年置侍中亦

曰世

又有都部署司掌本宮契丹軍民之事官有都

部署副部署判官又有提轄司官制未詳又有馬羣

司官有侍中敝史又有錫林官有伊勒錦

本名穆嚕穆特本改

錫袞會同元年升

瑪爾布

本名達爾罕會同元年改

其下為牙書

會同元年置

又有幹里

內族外戚世官犯罪沒入幹里

官名瑪古所屬為摩里官

名札薩克轄又有德里官名未詳

遼史百官志太祖弘義宮太宗永興宮世宗積慶
宮應天皇太后長寧宮穆宗延昌宮景宗彰愍宮
承天皇太后崇德宮聖宗興聖宮興宗延慶宮道
宗太和宮天祚永昌宮孝文皇太弟敦睦宮為十
二宮又有文忠王一府見營衛志者各有部署等
官詳太后宮門

又押行宮輜重伊勒希巴官有伊勒希巴其屬有敝
史掌諸宮巡幸扈從輜重之事

南面宮官漢人行宮都部署院

亦曰南面行宮都部署
司聖宗開泰九年改左

射僕

官有都部署副部署知諸行宮副部署同知都部署

事同簽都部署事都部署判官

又十二宮南面行宮都部署司官有漢人行宮都部

署南面副都部署同知漢人都部署

又中京大內都部署司官有都部署副部署

金管勾北太一宮同樂園二人掌守宮園繕修之事

又有慶元宮掌鋪陳祭器諸物小都監一人東京宮

苑使一人東京萬寧宮小都監一人

元尚供總管府掌守護東涼亭行宮及游獵供需之事
有達嚕噶齊總管同知副總管判官經歷知事提控案牘各一人

世祖至元十一年置扎哈齊巴勒嚕遜達嚕噶齊仁
宗延祐二年改總管府

其屬香河等處巡檢司巡檢一人景運倉提點大
使副使各一人法物庫大使副使各一人

雲需總管府掌守護察罕淳爾行宮及行營供辦之事

設官與尚供同

延祐二年置

臣等謹按明之職官自靖難以後定都以前雖有行在之名然各散見於諸門茲不具

留守司

皇城司附

臣等謹按留守一官天子巡狩親征則置命親王或大臣總其事唐宋時又往往府尹及少尹兼之故馬端臨考叙於京尹之次今考遼金則以留守

司行帶府尹及少尹事元明之制又不盡然因移載於此而警巡院及兵馬指揮使司皆為京畿察捕之官則以類附焉

宋高宗紹興四年帝將親征以叅知政事孟庾為行宮留守

時奏差主管書寫機宜文字官一人幹辦官二人準備差遣差使各三人使臣五十人又置留司臺官一人五年罷之其後秦檜為行宮留守援例置官

寧宗嘉定二年專以曾為兵將有功績及名將子孫之有才畧者充皇城司

先是皇城司幹當官七人以武功大夫以上及內侍都知押班充掌宮城出入之禁令凡周廬宿衛之事宮門啓閉之節皆隸焉每門給銅符二鐵牌一左符留門右符請鑰鐵牌則請鑰者自隨以時參驗而啓閉之總親從親事官名籍辨其宿衛之地以均其番直人物偽冒不應法則譏察以聞凡臣僚朝覲上下

馬有定所自宰臣親王以下所帶人從有定數揭勝
以止其喧鬧神宗元豐六年詔幹當皇城司除兩省
都知押班外取年深者減罷止留十員哲宗元祐元
年詔幹當官閱三年無過者遷秩一等再任滿者減
磨勘二年元符元年詔應宮城出入請納官物呈稟
公事傳送文書并御厨翰林儀鸞司非次祇應聽於
便門出入即不由所定門者論如闌入律應差辦人
物入內及內諸司差人往他所應奉並前一日具名

數與經歷諸門報皇城司二年詔皇城司任滿酬獎
依熙寧五年指揮再任滿無遺闕取旨徽宗政和五

年詔皇城司可創置親從第五指揮以七百人為額

親從官舊有四指揮元
額共二千二百七十人

帝諭宰相以為如文臣館閣

儲才之地光宗紹熙初嘗欲留闕以儲將才循初意
也及帝嘉泰中復申明明隆興之詔屏除貧得妄進以
重其官至是復因臣僚言故有是命通前後觀之可

以見環衛儲才之意

餘詳馬
端臨考

遼南面五京留守司兼府尹官有留守行府尹事副留守知留守事府少尹同知留守事同僉留守事留守判官留守推官

又有上京城隍使司亦曰上京皇城司

金諸京留守司官有留守帶本府尹兼本路兵馬都總管同知留守事帶同知本府尹兼本路兵馬都總管副留守帶本府少尹兼本路兵馬副都總管留守判官都總管判官各一人掌紀綱總府衆務分判兵案之事推

官一人掌同府判分判刑案之事上京兼管林木事司

獄一人知法女直漢人各一人南京漢人二人京城十

四門

一開陽一宣仁一安利一平化一通遠一宜照一利川一崇德一迎秩一廣澤一順義一迎朔一順

常一廣智

各有尉一人副尉一人收支器物使各一人

以各門副

尉

宣宗貞祐元年每城一面設一人五年南京隨門添

設又有小都監後省

上京提舉皇城司提舉同提舉各一人

南京提舉京城所提舉同提舉各一人掌本京城壁及繕修等事不常置上京同管勾一人掌佐繕治受給官一人掌收支之事壕寨官一人掌督修造

皇城使一人副使一人掌宮闕繕修之事不常置

東京西京御容殿閣門各二人掌享祀禮數鋪陳祭器外又有都城所提舉同提舉左右廂官受給官掌城

隍門鑰等事屬工部

詳工部門

元大都留守司掌守衛宮闕都城調度本路供億諸務

兼理營繕內府諸郎都官原廟尚方車服殿廡供帳內苑花木及行幸湯沐宴游之所門禁關鑰啓閉之事官有留守五人同知副留守判官各二人經歷一人都事二人管勾承發架閣庫照磨兼覆料官部役官兼壕寨各一人

至元十九年罷宮殿府行工部置大都留守司兼本路都總管知少府監事二十一年別置大都路都總管府治民事并少府監歸留守司仁宗皇慶元年別

置少府監延祐七年罷少府監復以留守司兼監事

所屬修內司掌修建宮殿及大都造作等事領十四

局人匠四百五十戶

世祖中統二年置至元中增工匠計一千二百七十有二戶

有提點大使副使各一人直長五人吏目照磨各一人

部役七人其屬八

太木局掌殿閣營繕之事小木局泥廬局車局裝釘局銅局竹作局

繩局各有提領管勾及提控等

祇應司掌內府諸王邸第異巧工

作修襪應辦寺觀營繕領工匠七百戶有大使副使

各一人直長三人吏目一人

國初建兩京殿宇始置司以脩工役其屬

五

油漆局掌兩都官殿縣漆之工畫局掌諸殿宇藻繪之工銷金局掌諸殿宇裝蓋之工裱糊局掌諸

殿宇裝潢之工燒紅局掌諸宮殿所用心紅顏料各有提領管勾等

器物局掌內府

宮殿京城門戶寺觀公廨營繕及御用各位下鞍轡

吏克轎子帳房車輛金寶器物凡精巧之藝雜作匠

戶無不隸焉大使副使各一人直長二人吏目一人

中統四年始立御用器物局受省劄至元七年改為器物局

其屬十二

鐵局掌諸殿宇輕細

鐵工減鐵局掌造御用及諸官邸繫腰金鉢局掌製御用繫腰成鞍局掌造御用鞍轡象轎羊山鞍局掌造常課鞍轡諸物網局掌成造官殿網扇之工刀子局掌造御用及諸官邸寶貝佩刀之工旋局掌造御

用異樣木植器物之工銀局掌造御用金銀器盒繫腰諸物轎子局掌造御用異樣木植鞍子諸物採石局掌大匠營造內府殿宇寺觀橋牌石材之役又山場各有提領大使管勾提控等

大都城

門尉掌門禁啓閉管鑰之事有門尉二人副尉一人

至元二十年置以四集賽巴喇噶齊凡十一門曰麗正曰

文明日順承曰平則曰和義曰肅清曰安貞曰建德曰光熙曰崇仁曰齊化每門設官如上

屏

象牙局掌兩都宮殿營繕屏象龍床桌器繫腰等事

有大使副使直長各一人其屬二屏象局掌兩都宮殿香閣營繕之事

牙局掌宮殿象牙龍床之工各有提領等

大都四密場掌營造素白琉璃

磚瓦有提領大使副使各一人隸少府監

至元十年置

屬三

南密瑒西密瑒琉璃局各有大使副使一人

凡山採木提舉司掌

採伐車輛等雜作木植及造只孫繫腰刀把諸物達

嚕噶齊提舉同提舉副提舉吏目各一人

至元十年置

上都採山提領所提領副提領提控各一人

至元九年以採

伐材木錄石為灰徵發夫匠一百六十三戶遂置官以統之

凡山宛平等處管

夫匠所提領同提領各二人管領催車材戶提領一

人器備庫掌殿閣金銀寶器二千餘事有提點大

使各一人副使二人直長四人 甸皮局歲辦熟造

紅甸羊皮二千有奇有大使一人

至元七年置二十一年改隸留守司

上林署養種園花園苜蓿園

俱詳上林苑監

儀鸞局掌

殿庭燈燭張設之事及殿閣浴室門戶鎖鑰苑中龍

舟園檻珍異禽獸給用內府諸宮太廟等處祭祀庭

燎縫製簾帷洒掃掖庭領珠拉齊水手樂人禁蛇人

等二百三十餘戶輪直集賽大使四人副使直長各

二人都目一人

至元十一年置儀鸞局至大四年仁宗御西宮又別立儀鸞局設置亦同

延祐七年增大使領提領所四珠拉齊水手針工蠟燭局各有提領等官

木塲掌受給營造宮殿材木有提領大使副使各

一人至元四年置南東二木塲十七年併為一塲大都路管領諸色人

匠提舉司掌大都諸色匠戶理斷婚姻田詞訟等事提

舉同提舉副提舉各一人吏目六人中統四年置入匠鄂囉總管府

至元十二年改提舉司十五年兼管採石人戶管匠官真定東平二路每

路大使副使各一人保定路宣德府保定大使副使

管匠官各一人宣德二人大名路大使一人管匠官

三人晉寧冀寧大同河間四路每路大使副使各一

人

俱中統四年置

收支庫掌受給營繕提點大使各一人

副使直長各二人

至元四年置

諸色庫掌修內府材木及

江南徵索異樣木植并應辦官寺齋事大使副使各

一人

武宗至大四年置

太廟收支諸物庫大使副使各一

人

英宗至治二年以營治太廟始置

南寺北寺收支諸物二庫提

領大使各一人副使二人

至治元年以建壽安山寺始置

廣誼司

總和雇和買營繕織造工役供億物色之事有司令

同知副使判官經歷知事各二人照磨一人

至元十四年改

覆實司辨驗官兼提舉市令司成宗大德五年又分大都路總管府官屬置供需府文宗至順二年罷之

立廣
詭司

上都留守司兼本路都總管府職掌如大都留守司而兼治民事車駕還大都則領上都諸倉庫之事有留守六人同知副留守判官經歷各二人都事四人照磨兼管勾一人

所屬有修內司掌營修內府之事大使一人副使直

長各三人

至元八年置

祇應司掌粧鑾油染襪褙之事

大使一人副使二人直長三人

器物局掌造鐵器

內府營造釘線之事大使副使各一人直長二人

儀鸞局大使二人副使三人直長二人

至大四年罷典設改置為

局

兵馬司局

見兵馬司下

警巡院

見警巡院下

開平縣

達魯噶齊尹丞主簿尉典史各一人

平盈庫大使

副使各一人

至元三十年置

萬盈庫達魯噶齊監支納大

使副使各一人

中統初置

廣積倉

設官同工中統初置永盈倉大德間改為

廣積倉

萬億庫達魯噶齊提舉同提舉副提舉提控

案牘各一人

至元二十三年置

行用庫提點大使副使各

一人

稅課提舉司提舉二人同提舉副提舉提控

案牘各一人

成宗元年置

八作司掌與大都左右八

作司同

見工部

達魯噶齊提領大使副使各一人

至元十七

年置

餽廩司掌諸王駙馬使客飲食大使副使各一

人

至元二年置上都應辦所延祐五年改為餽廩司

明留守司掌中都興都守禦防護之事官有正留守副

留守各一人指揮同知二人其屬經歷司經歷都事斷事司斷事副斷事吏目各一人

太祖洪武二年詔以臨濠為中都置留守衛指揮使司隸鳳陽行都督府十四年始置中都留守司統鳳

陽等八衛

鳳陽衛 鳳陽中衛 鳳陽右衛 皇陵衛 留守左衛 留守中衛 長淮衛 懷遠衛

防護

皇陵設留守一人左右副留守各一人

屬官經歷以下如前所列

世宗嘉靖十八年改荊州左衛為顯陵衛置興都留守司統顯陵承天二衛防護顯陵設官如都馬

城門郎洪武初置十八年革以門禁鎖鑰銅牌命中軍都督府掌之後京城各門置守門千戶所

警巡院

遼南面五京警巡院官有警巡使副使

又中京巡邏使司有巡邏使東京軍巡院有軍巡使

東京有歸化營軍千餘人籍河朔亡命於此置軍巡院

金諸京警巡院使一人掌平理獄訟警察別部總判院

事副一人

惟東西北上京無副使

掌警巡之事判官二人掌檢稽

失簽判院事

元左右警巡二院官有達嚕噶齊使副使判官各一人
典史各三人

至元六年置領民事及供需視大都路大德五年分
置供需院以副使判官典史各一人主之

又大都警巡院達嚕噶齊使各一人副使判官典史
二人大德九年置以治都城之南

元史百官志屬大都路都總管府順帝至正十

八年又於大都在城四隅各立警巡分院官吏視
本院減半

又上都警巡院達魯噶齊使各一人副使判官各二
人

元史百官志屬上都留守司兼本路總管府

兵馬指揮使司

遼北面諸指揮使

見各路
將官門

南面京官南京侍衛親軍馬步軍都指揮使司各有都

指揮使副使

黃龍府侍衛親軍馬步軍都指揮使設官同上

方州官馬步軍都指揮使司有使副使馬步軍指揮使司各有使副使屬節度使

軍官指揮使司有都指揮使副使都監

侍衛親軍馬步軍控鶴兵馬漢軍兵馬俱有都指揮使司

四軍兵馬都指揮使司

目等謹按此下又有宣力軍四捷軍天聖軍漢軍
四都指揮使司殆即此所謂四軍也

歸聖軍兵馬都指揮使司聖宗統和五年以宋降軍

置七指揮署左右廂

左右廂各有第一二三四五六七等名

凡四十二

人七年隸歸聖軍都總管府

金諸總管府節鎮兵馬司官有都指揮使一人巡捕盜

賊提控禁夜糾察博徒屠宰牛馬總判司事副都指揮

使二人貳使職通判司事分管內外巡捕盜賊

軍典十二人掌

本庫各籍差遣文簿行署文
書巡捕等事餘軍典同此

指揮使一人鈐轄四都之兵以屬都指揮使專署本

指揮使事軍使一人指揮之職左右什將各一人共

管一都

軍典二人營典左右承局左右押官各一人以上軍員每百人為一指揮使各一人分四

都每都設左右什將承局押官各一若人數不及附近相合者並依工置如無可相合者三百人以上為

一指揮二百人以上止設指揮使一百人止設軍使仍每百人以上立為一都不及百人設什將承局押

官各一其指揮下軍使什將下軍典營典各同此置惟北京西京止設副使各一人

諸府鎮都軍司都指揮使一人

又有節鎮軍都指揮使

掌軍卒差

役巡捕盜賊總判軍事仍與錄事同管城隍

軍典二人

凡諸府及節鎮並依此置

諸防刺州軍轄一人掌同都軍兼巡捕仍與司候同管

城壁

軍典二人

諸府州兵馬鈐轄一人掌巡捕盜賊若有盜則總押隨

處巡尉併力擒捕

京兆咸平濟南翔萊密懿鞏州並依此置惟京兆咸平府置兵馬都鈐轄

省餘並

元大都路兵馬都指揮使司凡二掌京城盜賊姦偽鞠

捕之事官有都指揮使二人副指揮使五人知事提控案牘各一人

至元九年改千戶所為兵馬司隸大都路而刑部尚書一人提調司事凡刑名則隸宗正且為宗正之屬二十九年署都指揮使等官其後因之一置司於北城一置司於南城

又司獄司凡三司獄獄丞各一人獄典二人掌囚繫獄具之事一置於大都路一置於北城兵馬司一置

於南城

百官志兵馬都指揮使司及司獄司屬大都路都
總管府

上都路兵馬司局指揮使三人副指揮使二人知事提

控案牘各一人

至元二十九
年置

添設四處兵馬司都指揮指揮各二人副指揮各四人
經歷知事提控案牘各一人司獄獄丞各一人

至正十年十月中書省奏東南千里外妖氣見合立

兵馬司掌防禦之職遂置大名東平濟南徐州四兵馬司每司設官吏如上十一年罷沂州分元帥府改立兵馬指揮使司十五年十月濟寧添設副指揮一人

明五城

中東西南北

兵馬指揮司掌巡捕盜賊疏理街道溝

渠及囚犯火禁之事凡京城內外各畫境而分領之境內有遊民姦民則逮治若車駕親郊則率夫里供事各有指揮一人副指揮四人吏目一人

凡親郡王妃父無官者親王授兵馬


指揮郡王授副
指揮不管事

明初置兵馬指揮司設都指揮副都指揮知事後改
設指揮使副指揮使各城門設兵馬洪武元年命在
京兵馬指揮司并管市司每三日一次校勘街市斛
斗秤尺稽考牙僧姓名時其物價五年又設兵馬指
揮司分司於中都十年改為指揮副指揮職專京城
巡捕等事草知事二十三年定設五城兵馬指揮司
惟中城止稱中
兵馬指揮司
俱增設吏目惠帝建文中改為兵馬

司改指揮副指揮為兵馬副兵馬成祖永樂元年復舊二年設北京兵馬指揮司世宗嘉靖四十一年詔巡視五城御史每年終將各城兵馬指揮會本舉劾穆宗隆慶間御史趙可懷言五城兵馬司官宜取科貢正途職檢驗死傷理刑名盜賊如兩京知縣不職者巡城御史糾劾之

南京五城兵馬司指揮各一人副指揮各三人吏目各一人

神宗萬厯中革副指揮每城二人



欽定續文獻通考卷五十九

欽定四庫全書

史部

欽定續文獻通考卷六十

編修_臣 翟槐覆勘

總校官內閣中書_臣 孫溶

欽定四庫全書

欽定續文獻通考卷六十

職官考

布政使司

臣等謹按馬端臨考有承宣使始於唐迄於宋似同於今之承宣布政使然考政和時改觀察留後為承宣使實非今之布政使司比也今之布政司昉於明初行中書省唐書百官志官司之別為省

如尚書黃門中書秘書殿中尚侍六省是也明既
改行中書省為十三承宣布政司而向所稱各道
各路者遂叛為十三省之名是布政司固當列於
行中書省之後然明代改設以來布政司為一方
守土官之首與都指揮使提刑按察使稱三司或
布按並稱則曰藩臬兩司兩司設官互有兼銜故
置於諸按察司前

明承宣布政使司左右布政使各一人左右叅政叅議

無定員

參政參議因事添設各省不等詳諸道

所屬經歷司經歷都事照磨所照磨檢校理問所理問副理問提控案牘司獄司司獄庫大使副使倉大使副使各一人又雜造局軍器局寶泉局織染局各大使副使一人

所轄衙門各首不同詳見雜職

布政使掌一省之政朝廷有德澤禁令承流宣布以下於有司凡僚屬滿秩廉其稱職不稱職上下其考報撫按以達於吏部都察院三年率其府州縣正官

朝覲京師以聽察典十年會戶版以登民數田數賓
興貢合省之士而提調之宗室官吏師生軍伍以時
班其祿俸廩糧祀典神祇謹其時祀民鰥寡孤獨者
養之孝弟貞烈者表揚之水旱疾疫災祲則請於上
蠲賑之凡貢賦役視府州縣土地人民豐瘠多寡而
均其數凡有大興革及諸政務會都按議經畫定而
請於撫按若總督其國慶國哀遣僚貳朝賀帛祭於
京師天子即位則左布政使親至叅政叅議分守各

道及派管糧儲屯田清軍驛傳水利撫民等事併分

司協管京畿

兩京不設布按無叅政叅議副使僉事故於旁近布按分司帶管詳見各道

經歷都事典受發文移其詳巡按巡鹽御史文書用
經歷印照磨檢校典勘理卷宗理問典刑名

太祖洪武九年改浙江江西福建北平廣西四川山
東廣東河南陝西湖廣山西諸行中書省俱為承宣
布政使司罷行省平章政事左右丞等官改叅知政
事為布政使左右叅政改左右司為經歷司十四年

增置左右叅議尋增設左右布政使各一人十五年
置雲南布政司惠帝建文中裁一人成祖復舊制永
樂元年以北平布政司為北京五年置交趾布政司
十一年置貴州布政司

止設使一人餘
官如各布政司

宣宗宣德三

年罷交趾布政司除兩京外定為十三布政司初置
藩司與六部均重布政使入為尚書侍郎副都御史
每出為布政使宣德正統間猶然自後無之

布政司叅政叅議分司諸道

督糧道

十三布政司各
一員俱駐省城

督冊道

江西陝西
等間設

分守道浙

江杭州嘉湖道寧紹台道金衢嚴道溫處道

俱駐省

江

西南瑞道

駐省

湖東道

駐廣信

湖西道

駐臨江

饒南九江道

江

駐九江

贛南道

駐南安

山東濟南道東兗道海右道

俱駐省

山西冀寧道

駐省

河東道

駐蒲州

冀北道

駐大同

冀南道

駐汾

州陝西關內道

駐省

關西道

駐鳳翔

西寧道

駐涼州

關南道

駐興安

河西道

駐慶陽

隴右道

駐鞏昌

河南大梁道

駐省

河南

道

駐河南

汝南道

駐南陽

河北道

駐懷慶

湖廣武昌道下荆

南道

駐陽

上荆南道

駐蕪兵備

荆西道

駐蕪兵備

上湖南

道下湖南道上江防道

或駐荆州岳州

下江防道福建興泉

道

駐泉州

福寧道

駐興化

漳南道

駐漳州

建南道

駐延平

汀漳

道

駐上杭縣

廣東嶺東道

駐潮州

嶺西道

駐高州

羅定道

駐魚兵備

羅定州

嶺北道嶺南道

駐南雄

四川川西道川北道

駐寧州

上下川東道

駐涪州

上川南道

駐雅州嘉定二署

下川南道

駐叙州瀘州

二署

廣西桂平道

駐省

蒼梧道

駐梧州

左江道

駐潯州

右江道

駐柳州

貴州安平道貴寧道

駐省

新鎮道

駐平越

思仁道

駐思

南

雲南臨安道騰衝道瀾滄道

以上或參政或叅議

臣等謹按明史百官志布政司所分諸道各省因事添設或置或罷故總詳於右云

按察使司

宋寧宗嘉定十四年六月初置沿江制置副使司於鄂州

臣等謹按唐有十道按察採訪處置使宋沿其制

諸州各置觀察使

亦曰承宣觀察使

已詳馬端臨考

遼南面中京路按問使司官有使

又五京處置使司官各有使

分司官有分決諸道滯獄使按察諸道刑獄使又有採訪使

臣等謹按遼史百官志分司官平理庶獄採訪撫民
隱官不常設有詔則選材望官為之如太宗會同
三年命于骨鄰為採訪使聖宗統和九年命邢抱
朴等五人馬守瑛等三人分決諸道滯獄開泰五

年遣劉涇等分路按察刑獄是也

邊防官有霸建宜泉錦五州制置使司平灤營三州處置使司霸州處置使司皆有使

諸州軍觀察使官有使副使判官

中京道高武安利三州東京道益寧歸三州及寧江州混同軍上京道永州永昌軍及靜州置觀察使司凡九

金按察司本提刑司官有使副使判官等

臣等謹按章宗紀世宗大定二十九年六月初置
提刑司分按九路並兼勸農採訪事屯田鎮防諸
軍皆屬焉又命提刑官除後於便殿聽旨每十月
使副內一人入見議事如止一人則令判官入見
其判官所掌繁劇可升同隨朝職八月定提刑司
所掌三十二條明昌二年十一月勅提刑司官自
今每十五日一朝三年四月勅外路冤獄委提刑
司處決六月宰臣請罷提刑司帝曰諸路提刑司

官止三十餘員猶患不得其人州縣三百餘處其
能盡得人乎弗許又定提刑司條制至四年始改
按察司此百官志所以云按察司本提刑司也

又按金史百官志章宗承安三年正月並上京東
京兩路為一提刑使兼宣撫使勸農採訪事以兼
宣撫副使判官為名復改宣撫為安撫各設安撫
判官一人提刑一人通判四人安撫使掌鎮撫人
民譏察邊防軍旅審錄重刑事安撫判官則銜內

不帶勸農採訪事令專管千戶穆昆安撫使副內
差一人於咸平一人於上京分司四年四月罷咸
平分司使在上京副在東京各設簽事一人改為
按察司泰和八年十一月以轉運使權輕州縣不
畏不能規措錢穀遂詔諸路按察使並兼轉運使
副使兼同知簽按察並兼轉運副添按察判官知
事各一人知法二人此本紀所以云按察司並兼
轉運司也至宣宗貞祐三年又罷按察司使止委

監察採訪使一人掌審察刑獄照刷案牘糾察濫官汚吏豪猾之人私鹽酒麴並應禁之事兼勸農桑與副使簽事更出巡按云

元提刑按察司國初立後改為肅政廉訪司凡二十二道每道使副司各二人僉事四人

兩廣海南止二人

所屬經歷知事照磨兼管勾各一人

初世祖至元六年二月以立四道提刑按察司詔諭諸道曰山東東西道曰河東陝西道曰山北東西道

曰河北河南道八月以提刑按察司兼勸農事八年
置河東山西道陝西四川道十二年分置燕南河北
道十三年以省併衙門罷按察司十四年復置增立
八道曰江北淮東道曰淮西江北道曰山南江北道
曰浙東海右道曰江南浙西道曰江東建康道曰江
西湖東道曰嶺北湖南道十五年復增三道曰江南
湖北道曰嶺南廣西道曰福建廣東道十九年增西
蜀四川道二十年增海北廣東道改福建廣東道曰

福建閩海道以雲南七路置雲南道以女直之地置
海西遼東道二十二年九月立按察司巡行郡縣法
除使二人留司副使以下每歲二月分莅按治二十
三年以淮東淮西山南三道撥隸內臺二十四年增
河西隴右道是年罷雲南道二十五年罷海西遼東
二十七年以雲南按察司所治立雲南行御史臺三
月增提刑按察司僉事二人總勸農事二十八年改
為肅政廉訪司成宗大德元年徙雲南行臺於陝西

復立雲南道其後遂定為二十二道設官如上

內道八隸御史臺為山東東西道

濟南路
置司

河東山西

道

冀寧路
置司

燕南河北道

真定路
置司

江北河南道

汴梁路
置司

山南江北道

中興路
置司

淮西江北道

廬州路
置司

江北淮東

道

揚州路
置司

山北遼東道

大寧路
置司

江南十道隸江南行臺為江東建康道

寧國路
置司

江西

湖東道

龍興路
置司

江南浙西道

杭州路
置司

浙東海右道

婺州

路置司

江南湖北道

武昌路
置司

嶺北湖南道

天臨路
置司

嶺南

廣西道

靜江府置司

海北廣東道

廣東路置司

海北海南道

雷州

路置司

福建閩海道

福州路置司

陝西四道隸陝西行臺為陝西漢中道

鳳翔府置司

河西

隴北道

甘肅路置司

西蜀四川道

成都路置司

雲南諸路道

中慶

路置司

臣等謹按元史順帝紀及蘇天爵傳至正五年命

奉使宣撫巡行天下天爵前山東道肅政廉訪使

召還仍為集賢殿侍講學士至是與西臺中丞定

定同巡京畿道究民所疾苦察吏之姦貪其興除者七百八十有三事其糾劾者九百四十有九人都人有包韓之譽然以忤時相意竟坐不稱職罷歸蓋當時吏治陵替概可知矣

明提刑按察使司按察使一人副使僉事無定員所屬經歷司經歷知事照磨所照磨檢校司獄司司獄各一人

按察使掌一省刑名按劾之事糾官邪戢奸暴平獄

訟雪冤抑以振揚風紀而澄清其吏治大者暨都布
二司會議告撫按以聽於部院凡朝覲慶弔之禮具
如布政司副使僉事分道巡察其兵備提學撫民巡
海清軍驛傳水利屯田招練監軍各專事宜併分員
巡備京畿

明初置提刑按察司吳元年置各道按察司設按察
使副使僉事洪武十三年罷十四年復置并置各道
按察分司十五年又置天下府州縣按察分司以儒

士王存中等五百三十一人為試僉事人按二縣凡

官吏賢否軍民利病皆得廉問糾舉十六年盡罷試

僉事二十九年改置按察分司為四十一道直隸六

曰淮西道曰淮東道曰蘇松道曰

建安徽寧道曰常鎮道曰京畿道

四川三
曰川東道曰川西道曰黔南道山東三
曰濟南道曰海右道曰遼海東寧道河

南二
曰河南道曰河北道北平二
曰燕南道曰燕北道陝西五
曰關內道曰關南道

右道曰西寧道
山西三
曰冀寧道曰冀北道曰河東道江西三
曰嶺北道

曰兩江道
廣東三
曰嶺南道曰海北道廣西三
曰桂林蒼梧道曰左

曰湖東道

江道曰福建二曰建寧道湖廣四曰武昌道曰荆南

北道三十年始置雲南按察司先是命布政司兼理建文時改為

十三道肅政按察司成祖初復舊永樂五年置交趾

按察司又增設各按察司僉事因督軍衛屯糧增浙

廣河南雲南四川各一人陝西福建江西廣東廣西十二年置貴州

按察司宣德五年革交趾按察司除兩京不設共英

宗正統三年增設理倉副使僉事又設僉事與布政

司叅議各一員於甘肅監收倉糧八年增設僉事專

理屯田景帝景泰二年增巡河僉事

按察司副使僉事分司諸道

提學道

十三布政司俱各一人惟湖廣二人

清軍道驛傳道

十三布政司亦俱各

一人惟浙江山西陝西福建廣西貴州清軍兼驛傳江西右布政使清軍

分巡道為浙江

杭嚴道寧紹道嘉湖道金衢道江西饒南九江道

駐饒

州湖西道

駐吉安

南昌道湖東道嶺北道山東兗州道

州駐沂

濟寧道青州海防道濟南道

移德州

海右道

駐省海

道

駐萊州

登萊道遼海道山西冀寧道冀南道

駐潞安

雁

門道陝西關內道

駐郿州

關西道

駐平涼

隴右道

駐秦州

河

西道

駐郿州

西寧道河南大梁道汝南道

駐信陽州

河南道

駐汝州

河北道

駐磁州

湖廣武昌道荆西道

駐河陽

上荆南

道下荆南道湖北上湖南道下湖南道沅靖道福建

巡海道

駐魚理糧儲

福寧道興泉道

駐泉州

建南道

駐建寧

武平

道漳南道

駐上杭縣

建寧道海道

駐漳州

汀漳道廣東嶺東

道

駐惠州

嶺西道

駐肇慶

嶺南道

駐省

海北道

駐雷州

海南道

駐瓊州

四川上東道

駐重慶

下東道

駐達州

川西道川北道

駐保寧

下川南道上川南道廣西府江兵巡道

駐樂平

桂

林兵巡道

駐省

蒼梧兵巡道

駐梧林

梧州移

左江兵巡道

駐賓

州

右江兵巡道

駐柳州

上五道俱備

貴州貴寧道思石

道

駐仁銅

都清道

駐都勻

雲南安普道臨沅道洱海道

金滄道整飭兵備道浙江寧紹道嘉興道溫處道台

海道江西南瑞道廣建道

駐建昌

山東臨清道武德道

駐武定州

曹濮道

駐曹州

沂州道遼東道山西雁北道

駐代州

大同道

二員一駐朔州

陽和道路安道奇嵐道陝西肅

州道固原道臨洮道

駐蘭州

洮岷道

駐岷州

靖遠道榆林

東路道

駐神木縣

寧夏河西道

駐寧夏

寧夏河東兵糧道

駐花

馬池莊浪道漢羌道潼關道湖廣辰沅道河南睢東道

福建兵備道巡海道廣東韶道南雄道四川松潘

道威茂道建昌道重慶道安綿道叙瀘道廣西分巡

兼兵備

五道俱見分巡

貴州威清道

駐安順

畢節道雲南曲靖

道其外又有協堂

副使河南浙江間設

水利道

浙江

屯田道

江西河南

四川三省屯田兼驛傳

管河道

河南

鹽法道撫治道

陝西撫治南洛道湖廣又

有撫民撫苗道

監軍道

因事不常設

招練道

山東間設

其北直隸之道

寄銜於山東者則為密雲道大名道天津道霸州道
寄銜於山西者則為易州道口北道昌平道井陘道
薊州永平等道南直隸之道寄銜於山東者太倉道
潁州道徐州道寄銜浙江江西湖廣者蘇松道漕儲
常鎮道廬鳳道徽寧池太道淮揚道

職官志曰按明初制恐守令貪鄙不法故於直隸
府州縣設巡按御史各布政司所屬設試僉事已

罷試僉事改按察分司四十一道此分巡之始也
分守起於永樂間每令方面官巡視民瘼後遂定
右叅政右叅議分守各屬府州縣兵道之設昉自
洪熙間以武臣疎於文墨遣叅政副使沈固劉紹
等往各總兵處整理文書商確機密未嘗身領軍
務也至宏治中本兵馬文升慮武職不脩議增副
僉一員救之自是兵備之員盈天下兩京不設布
按二司故督學以御史後置守巡諸員無所屬則

寄銜於鄰近省布按司官

臣等謹按按察司所分諸道自景泰二年後各省因事添設或置或罷不可勝紀故亦總詳於右

轉運使司

宋都轉運使等官掌經度一路財賦而察其登耗以足上供及郡縣之費

歲行所部檢察儲積稽考帳籍凡吏蠹民瘼悉條以
上達及專舉刺官吏之事神宗熙寧初詔河東河北

陝西三路漕臣許乘傳赴闕留毋過浹日既又詔三路漕臣令自辟屬各二人以京朝官曾厯知縣者為之二年詔川陝閩廣七路除堂選守臣外委轉運司依四選例立格就注免赴選具為令元豐初詔河北淮南京東京西及陝右雖各析為兩路許依未析時通治兩路之事錢穀聽其移用哲宗元祐初司馬光請漕臣除三路外餘路毋得過二人其屬官溢員亦省之紹聖中詔淮浙江湖六路上供米計其遠近分

三限自季冬至明年八月以次輸足徽宗大觀中陝西漕臣以四人為額政和中又詔陝西以三人熙泰兩路各二人宣和初又詔陝西以都漕兩人總治於長安而漕臣三人分領六路南渡後置官掌一路財賦之入按歲額錢物斛斗之多寡而察其稽違督其欠負以供於上間詣所部則財用之豐歉民情之休戚官吏之勤惰皆訪問而奏陳之有軍旅之事則供餽錢糧或令本官隨軍移運或別置隨軍轉運使一

人或諸路事體當合一則置都轉運使以總之

江東西路

分置三帥置都轉運使一人張公濟為江浙荆湖廣南福建都運趙開為四川都運隨軍及都

運廢置不常而正使不廢若副使若判官皆隨資之

淺深稱焉

餘詳馬端臨考

遼南面山西路都轉運使司奉聖尉應朔保五州轉運使司西山轉運使各有使副使同知判官

奉聖等五州轉運使聖宗開泰三年置

上京鹽鐵使司東京戶部使司中京度支使司南京三

司使司南京轉運使司

亦曰燕京轉運使司

西京計司各有使知

使事副使同知使事判官

諸錢帛司官有都點檢

其可見者長春路錢帛司

興宗重熙二十二年置

又遼西路平

州路錢帛司

臣等謹按百官志謂遼以畜牧田漁為稼穡財賦之官初甚簡易自聶呼教耕而後鹽鐵利用日以滋殖既得燕代益富饒焉

金都轉運司掌稅賦錢穀倉庫出納權衡度量之制官

有使其紀綱衆務分判勾案有同知副使都勾判官惟南

京勾判兼上又有判官二人舊止一人承安四年增置一人不許別差

專管拘收徵剋等事支度判官二人掌勾判分判支度

案事鹽鐵判官一人都孔目官勾稽文牘知法各二人

金史百官志曰惟中都路置都轉運司餘置轉運

司省支度判官一人南京西京北京遼東山東西

路河北東路則置女直知法漢知法各一人山東

東路河東南路北路河北西路陝西東西路則置

漢知法一人餘官並同中都

漕運司掌河倉漕運之事官有提舉一人景州刺史兼領同提

舉一人及勾當官掌督催起運綱船景州依此置肇州以提舉兼本州同

知同提舉

兼州判

山東鹽運使司與寶坻滄解遼東掌幹辦鹽利以佐國

用官有使一人他司皆同副使二人他司皆同判官三人泰和作四

人寶坻解州設二又管勾二十二人寶坻解州六人北京遼東滄州四

人同管勾都同監皆省掌分管諸場發買收納恢辦之事同管勾

五人都監八人同監七人知法一人他司皆同

三司掌勸農鹽鐵度支官有使副使簽三司事同簽三

司事各一人判官三人知事二人以識女直漢字人充勾當官二

人管勾架閣庫一人知法三人

章宗泰和八年省戶部官員置謂兼勸農鹽鐵度支

戶部三科也宣宗貞祐中罷之判官本參幹官衛紹王大安元年更參議

規措審計官掌同參幹官知事以識女直漢字人充興定三年七月又置東西

南三路行三司

臣等謹按馬端臨考載轉運司令考遼金元明亦皆有之若酒麴榷貨倉庫等官似較轉運尊卑懸絕矣然皆為財賦官也故附載於後

中都都麴使司

酒使司院務稅醋使司榷場煎酒使司

掌監知人戶醞造

麴蘖辦課以佐國用官有使副使

餘酒使監醞辦課同此

掌簽署

文簿檢視醞造都監二人

凡京都及真定皆為都麴酒使司設官吏同此他處

置酒使司課及十萬貫以上者設使副小都監各一人五萬貫以上者設使副各一人三萬貫以上者設使及都監各一人不及二萬貫者為院務設都監同監各一人不及千貫之院務止設都監一人其他稅醋使司及權場與酒稅相兼者視課多寡設官吏皆同此

又提舉南京權貨司有提舉同提舉及勾當官三人
貞祐四年置中都都商稅務司掌從實辦課以佐國用

官有使副使各一人都監一人掌簽署文簿巡察匿

稅都監一人

餘置官吏同酒使司

南京豐衍東西庫官有使

副使又判官二人監支納各一人

隸運司

中都廣脩

庫掌匹帛顏色油漆諸物出納之事官有使副使判

官各一人永豐庫掌泉貨金銀珠玉出納之事官

有使副使判官各一人

所屬鑄錢院管勾生熟鐵釘線都監二人京府通州並依

此置判官都監皆省或兼軍器並作院或設使若副一人俸呼郡設都監一人仍兼軍器庫

南

京交鈔庫掌出入錢鈔兌使之事官有使副使各一

人

中都等處流泉務使副各一人

大定十三年帝以民間典質利息重者至五七分或以利為本小民苦之若官為設庫務十中取一為息以助官吏廩給之費似可便民有司奏於中都南京東平真定等處並置典質庫以流泉務為名各設官如上凡典質物使副親評價直許典七分利一分不及一月者以日計之經二周年外又逾月不贖即聽

下架出賣出帖子作寫質物人姓名物之名色金銀等第分兩及所典年月日錢貫下架年月之類若亡失者收贖日勒合干人驗元典官本并合該利息賠償入官外更勒庫子驗典物日上等時估償之物雖故舊依新價償仍委運司佐貳幕官識漢字者一人提控若有違犯則究治每月具數申報上司二十八年京府節度州添設流泉務凡二十八所明昌元年皆罷之二年在都依舊存設使副使各一人掌典解

諸物流通泉貨勾當官一人 中都店宅務掌官房

地基徵收官錢檢料修造摧毀房舍管勾四人各以

二人分左右廂南京店宅務同

又中都左右廂別貯院掌拘收退朴等物

及出給之事使副使各一人

又中都木場掌拘收材木諸物及出給之事使副使

判官各一人 中都買物司掌收買官中所用諸物

官有使副使各一人又掌支應等事都監四人 京

兆府司竹監管勾一人掌籓養竹園採斫之事管勾

一人

諸綾錦院

置於真定平陽太原河間懷慶

掌織造常課匹緞

之事官有使副使各一人

諸倉掌倉廩蓄積受納租稅支給祿廩之事官有使

副使

又有提舉倉場司使副使掌出納公平及毋致虧敗監支納官以年六十以下庶幹人充女直

漢人各一人乃貞祐時置也

草場掌儲積受納之事官有使副

使

中都南京歸德河南京兆鳳翔依此置西京省副使餘京節鎮科設副使一人佛呼仍舊置都監一

人

南京諸倉草場各有監支納官南京提控規運

柴炭有使副使又京西規運柴炭場有使副使

元京畿都漕運使司掌凡漕運之事官有運使同知副使判官各二人經歷知事各一人提控案牘兼照磨二人

世祖中統二年初立軍儲所尋改漕運所至元十五年改漕運司十二年改都漕運司十九年改京畿都漕運使司二十四年內外分立兩運司而京畿則領在京諸倉出納糧斛及新運糧提舉司站車僨運公事省同知運判知事各一人而押綱官隸焉仁宗延

祐六年增同知副使運判各一人其後定置正官各
二人首領官四人隸戶部

所屬新運糧提舉司置達嚕噶齊都提舉各一人同

提舉二人副提舉吏目各一人

至元十六年置管站車二百五十輛隸兵

部開設運糧壩
河改隸戶部

京師二十二倉

萬斯北萬斯南千
斯永平永濟惟憶

既盈大有屢豐積貯豐穰廣濟廣衍大積
既積盈衍相因順濟通濟慶貯豐潤豐實

每倉各置

監支納一人大使副使二人一人不等

俱中統至
元時置

通惠河運糧千戶所掌漕運之事中千戶一人中副

千戶二人

至元三十一年置

都漕運使司掌御河上下至直沽河西務李二寺通州等處僱運糧斛官有運使同知副使各二人運判三人經歷知事各一人提控案牘二人

內一人兼照磨

至元二十四年自京畿運司分立都漕運司於河西務置總司分司臨清隸戶部

所屬河西務十四倉

永備南永備北廣盈南廣盈北充溢崇墉大盈大京大稔足用

豐儲豐積

恒足既備

通州十三倉

有年富有廣儲盈止及秭迺積樂歲慶豐延豐足食

富儲富
衍及衍

河倉一十有七

館陶舊縣陵州傅家池秦家渡尖塚西尖塚東長蘆

武強夾馬營上口唐宋唐村安陵四柳樹淇門伏思

每倉各置監支納一人大

使副使二人一人不等

直沽倉一

廣通

大使一人

滎陽等綱凡三十

濟源陵州獻州白馬滏陽完州河南宮沂莒霸州東明獲嘉鹽山

武強膠水東昌武安汝寧修武安陽開封儀封蒲臺鄒平中牟膠西衛輝濬州曹州濮州

每綱

皆設押綱官二人

每編船三十隻為一綱船九百餘隻運糧三百餘萬石船戶八千餘

戶綱官以常選

正八品為之

海道運糧萬戶府掌每歲海道運糧供給大都官有達

嚕噶齊萬戶各一人副萬戶四人經歷知事照磨各一人鎮撫二人

所屬海運千戶所達嚕噶齊一人千戶二人副千戶三人若溫台若慶元紹興若杭州嘉興若崑山崇明常熟江陰等處凡五所平江又有海運香莎糯米千戶所

百官志順帝至元二年京畿都漕運司添設提調官運副運判各一人九年添設海道巡防官掌統

領軍人水手防護糧船巡防相副官各二人至正十五年升台州海道巡防千戶所為防禦海道運糧萬戶府又置分府於平江

大都陸運提舉司掌兩都陸運糧斛之事提舉二人副提舉吏目各一人

至元十六年始置運糧提舉司延祐四年改今名屬兵部

大都河間等路都轉運鹽使司掌場竈權辦鹽貨以資

國用官有使二人同知副使各一人運判二人首領官
經歷知事照磨各一人

國初立河間稅課達魯噶齊清滄鹽使所後叛運使
立提舉鹽權所又改為河間路課程所提舉清滄課
鹽使所中統三年改都提領拘權滄清課鹽所至元
二年以刑部侍郎右三部郎中兼滄清課鹽使司尋
改為河間都轉運鹽使司立清滄深三鹽司十九年
以刑部尚書行河間等路都轉運使司事尋罷改立

清滄二鹽使司二十七年改令戶部尚書行河間等
路都轉運使司事二十八年改河間等路都轉運司
延祐六年頒分司印巡行郡邑以防私鹽之弊所屬
鹽場二十二所以下鹽場各所其
名俱詳鹽鐵門每場設司令司丞
各一人

山東東路轉運鹽使司掌同上運判一人

國初置益都課稅所管領山東鹽場以總鹽課後改
置運司中統四年詔以中書左右部兼諸路都轉運

司至元二年命有司兼辦其課改立山東轉運司十二年改立都轉運司延祐五年以鹽法溢滯降分司印巡行各場督收課程罷膠萊鹽司所屬鹽場一十九所每場設司令司丞管勾各一人

河東陝西等處轉運鹽司掌同前運判二人

國初平陽府徵課程之利中統二年改立轉運司置提舉解鹽司至元二年罷運司命有司掌其事尋復置二十二年立陝西都轉運司諸色稅課悉隸焉二

十九年置鹽運使專掌鹽課其餘課稅歸有司解鹽
司亦罷延祐六年更為河東陝西等處都轉運鹽使
司隸省部所屬解鹽場管勾同管勾各一人河東安
邑提領所二有正提領副提領各一人

百官志以上屬戶部

兩淮都轉運鹽使司使二人同知副使各一人運判二
人經歷知事照磨各一人

國初兩淮內附以提舉馬里范章

食貨志
作張

專掌鹽課

之事至元十四年始置司於揚州設官如上三十年
悉罷所轄鹽司以其屬鹽場二十九所每場設司令
司丞管勾各一人大德四年復置批驗所於真州采
石等處掌批驗鹽引每所提領大使副使各一人
兩浙都轉運鹽使司使同知運判各二人經歷知事照
磨各一人

至元十四年置司杭州大德三年定其產鹽之地立
場有差仍於杭州嘉興紹興準台等處設檢校四所

專驗鹽袋毋過常度所屬鹽場三十四所每所設官
同前

百官志順帝至正二年講究鹽法准於杭州嘉興
紹興準台四處各置檢校批驗所直隸運司專批
驗鹽商引目均平袋法稱盤等事每所置檢校批
驗官相副官各一人

福建等處都轉運鹽使司設官同前

至元十三年始置市舶司領煎鹽徵課之事二十四

年改立鹽運使司二十九年罷立提舉司大德四年復為運司九年復罷併入元帥府兼掌之十年復立都提舉司武宗至大四年復升運司徑隸行省所屬鹽場七所每所設官同前

廣東鹽課提舉司提舉同提舉副提舉各一人

至元十三年始從廣州煎辦鹽課十六年隸江西鹽鐵茶都轉運司二十二年併入宣慰司二十三年置市舶提舉司大德四年改廣東鹽課提舉司設官如

上所屬鹽場十三所每所設官同前

廣海鹽課提舉司都提舉同提舉副提舉各二人知事
提控案牘各一人

至元三十一年置專職鹽課

四川茶鹽轉運司使同知副使運判經歷知事照磨各
一人

鹽井九十五處散在諸郡山中至元二年置興元四
川轉運司專掌煎熬辦課之事八年罷十六年復立

十八年併入四道宣慰司十九年復立陝西四川轉運司通轄諸課程事二十二年置茶鹽轉運司置官如上所屬鹽場二十一所每所設官同前

榷茶都轉運使司

至元十四年置十六年立江西榷茶運司十七年置榷茶都轉運司於江州二十五年改江西茶運司為都轉運使司文宗天歷二年罷榷茶司順帝元統元年復置江西湖廣江浙河南榷茶運司

臣等謹按元權茶之法前見於征權考者詳矣乃
元史百官志不載權茶都轉運使司惟載常湖等
處都提舉司及提領所等附見宣徽院下元統元
年復置湖廣江西權茶都轉運司云云蓋史氏之
疎如此今從本紀及食貨志補之若其員數則不
可得而詳矣

諸路寶泉都提舉司其屬有鼓鑄局永利庫

至正十年置掌鼓鑄至正銅錢印造交鈔十一年置

於河南行省及濟南冀寧等處凡九所江浙江西湖
廣行省各一所十二年置銅冶場於饒州路德興縣
信州路鉛山州鉛州岑水凡三處每所置提領大使
副使各一員流官內銓置直隸寶泉提舉司掌浸銅
事

檀景等處採金鐵冶都提舉司掌各冶採金煉鐵權貨
以資國用官有提舉同提舉各一人

中統時置景州提舉司管領景州灤陽新匠三冶至

元十四年又置檀州提舉司管領雙峰暗峪大峪五峰等冶大德五年併檀景三提舉司置都提舉司而灤陽雙峰等冶悉隸焉他如河東山西濟南萊蕪等處鐵冶提舉司及益都般陽等處淘金總管府其沿革蓋不一也

百官志有印造鹽茶等引局各官詳戶部又有提舉都城所等官見工部

市舶提舉司三每司提舉副提舉各二人知事一人

至元二十三年立鹽課市舶提舉司隸廣東宣慰司
三十年立海南博易提舉司至大四年罷之禁下番
船隻延祐元年弛其禁改立泉州廣東慶元三市舶
提舉司

河泊所建康等處三湖河泊所提領大使副使相副官
各一人安慶等處池州等處兩河泊所各大使副使一
人

百官志右河泊所官俱隸江淮等處財賦總管府

安慶一所又屬揚州等處財賦提舉司

臣等謹按百官志提舉提領設官最夥凡附見所

屬下者既詳於各門內矣又若特置之員提舉司

則有至元十六年之雜造局達魯噶齊提舉同提

舉副提舉各一人十七年之管領曹州東平等路

民匠司大都納綿司及保定織染局

設官各同上

二十

一年之管領大都民匠司提舉同提舉副提舉各

一人涿州成錦局人匠司達魯噶齊提舉同提舉

副提舉各一人又河間民匠司

設官同上

二十二年之

大都等處柰曼司達嚕嚕齊提舉副提舉各一人

大都等處金玉民匠稻田司大都薊州等處打捕

司

設官同上

大德二年之涿州等處民匠異錦局達嚕

嚕齊提舉同提舉副提舉各一人上用織染局提

舉同提舉副提舉各一人延祐五年之大都上都

打捕鷹房納米麵司達嚕嚕齊提舉各一人大都

涿州織染司河間路清州人匠司

設官同上

提領所則有

至元二十四年之上都人匠所達魯噶齊提領同
提領副提領各一人二十七年之上都大都掌本
位下齊哩克昆等事達魯噶齊大使副使各一人
致用庫大使一人副使二人何其設官繁多也此
外又有至元二十一年置之管領隨路諸色民匠
達魯噶齊等官達魯噶齊總管同知副總管各一
人二十七年置之上都人匠達魯噶齊副使各二
人管領豐州鼎濟局掌織造花毯頭目一人至元十

七年置皆附詳於此以備考

明都轉運鹽使司掌辦鹽課事官有都轉運使分司之者為同知副使各一人判官無定員

其屬經歷司經歷知事庫大使副使各一人所轄各場鹽課司大使副使各倉大使副使各批驗所大使副使各一人

都轉運鹽使司凡六曰兩淮曰兩浙曰長蘆曰河東曰山東曰福建分司十四泰州淮安通州隸兩淮嘉

興松江寧紹溫台隸兩浙滄州青州隸長蘆膠萊濱
樂隸山東解鹽東場西場中場隸河東分副使若副
判涖之督各場倉鹽課司以總於都轉運使共奉巡

鹽御史或鹽法道臣之政令

福建山東無
巡鹽御史

鹽課提舉司其職掌皆如都轉運司官有提舉同提舉
各一人副提舉無定員

其屬吏目庫大使各一人所轄各鹽倉大使副使各
場各井鹽課司大使副使各一人

提舉司凡七曰四川曰廣東海北州曰黑鹽井楚雄曰

白鹽井

姚安

曰安寧曰五井大理曰察罕腦兒又有遼東

煎鹽提舉司

明初置都轉運司於兩淮吳元年置兩浙都轉運司
於杭州設同知副使運判經歷知事照磨綱官鹽場
設司令司丞百夫長洪武二年置長蘆河東二都轉
運司及廣東海北鹽課提舉司尋又置山東福建二
都轉運司三年又於陝西察罕腦兒之地置鹽課提

舉司後漸增置各處建文中改廣東提舉為都轉運
司永樂復故十四年初命御史巡鹽景泰三年罷長
蘆兩淮巡鹽御史命撫按官兼理已復遣御史其無
御史者分按察司理之又洪武中於四川置茶鹽都
轉運司洪武五年置設官如都
轉運鹽使司十年罷納溪白渡二鹽馬司
洪武五年置以常選官為司令內使為司丞十
三年罷尋復置十五年改設大使副使各一人後并
革又有順龍鹽馬司亦革

臣等謹按以上皆轉運司事也其總督倉場及總

督漕運都御史總兵巡漕御史等官已分見戶部
及御史臺將官各門茲不複載若此後有茶馬司
等其為職掌微矣然無可附見特載於後又有寶
鈔廣惠庫等已見戶工等部門故不贅

茶馬司掌市馬之事官有大使副使各一人

洪武中置洮州秦州河州三茶馬司設司令司丞十
五年改設大使副使各一人尋罷洮州茶馬司以河
州茶馬司兼領之三十年改秦州茶馬司為西寧茶

馬司又洪武中置四川永寧茶馬司後革復置雅州

碶門茶馬司又於廣西置慶遠峪民司

洪武七年置設大使副使

各一市八番溪洞之馬後亦革

批驗所掌驗茶鹽引官有大使副使各一人

市舶提舉司掌海外諸番朝貢市易之事辨其使人表
文勘合之真偽禁通番征私貨平交易閑其出入而慎
館穀之

吳元年置洪武三年罷太倉黃渡市舶司七年罷福

建之泉州浙江之明州廣東之廣州三市舶司永樂
元年復置設官如洪武初制尋命內臣提督之世宗
嘉靖元年給事中夏言奏倭禍起於市舶遂革福建
浙江二市舶司惟存廣東市舶司

稅課司

府曰司
縣曰局

典稅事大使一人

凡商賈僧屠雜市皆有常征以時權而輸其直於府
若縣凡民間貿田宅必操契券請印乃得收戶則征
其直百之三又明初改在京官店為宣課司府州縣

官店為通課司後改通課司為稅課司局

倉倉大使副使庫庫大使織染雜造局大使副使俱各一人河泊所官掌收魚稅閘官壩官掌啟閉蓄洩

洪武十五年定天下河泊所凡二百五十二歲課糧五千石以上至萬石者設官三人千石以上設二人三百石以上設一人

遞運所掌運遞糧物官有大使副使各一人

洪武九年置

先是在外多以衛所戍守軍士傳送軍囚太祖以其

有妨練習守禦乃命兵部增置各處遞運所以便遞
送設大使副使各一人驗夫多寡設百夫長以領之

後汰副使

革百夫長

鐵冶所大使副使各一人

洪武七年初置凡十三所

節度使

防禦使團練使諸州刺史附

宋節度使

詳馬端臨考
防禦使團練使諸州刺史並同

遼北面約尼帳節度使司官有使副使

大部族節度使司有使副使判官小部族亦有節度

使司

官未詳

邊防官有倒塌嶺塌西塌母城三節度使司

互見將官門

屬國官各部節度使司官有使副使

百官志準卜國大王府有準卜扎拉部節度使司

準卜諸部節度使司

統和二十九年置

準卜別部節度使

司

南面方州官諸州軍節度使官有使副使同知使事

又有行軍司馬軍事判官掌書記衙官

上京道懷州奉陵軍慶州元寧軍泰州德昌軍長春
州韶陽軍儀坤州啟聖軍龍化州興國軍饒州匡義
軍徽州宣德軍成州長慶軍懿州廣順軍渭州高陽
軍鎮州建安軍 東京道開州鎮國軍保州宣義軍
辰州奉國軍興州中興軍海州南海軍涿州鴨綠軍
顯州奉先軍乾州廣德軍貴德州寧遠軍瀋州昭德
軍遼州始平軍通州安遠軍雙州保安軍同州鎮安

軍咸州安東軍信州彰聖軍賓州懷化軍懿州寧昌
軍蘇州安復軍復州懷德軍祥州瑞聖軍 中京道
成州興府軍興中府彰武軍宜州崇義軍錦州臨海
軍川州長寧軍建州保靜軍來州歸德軍 南京道
幽州盧龍軍平州遼興軍 西京道雲中大同軍雲
內州開遠軍奉聖州武定軍蔚州忠順軍應州彰國
軍朔州順義軍置節度使司凡四十八

臣等謹按百官志節度使各有馬步軍都指揮使

司詳指揮使門

金諸節鎮節度使一人掌鎮撫諸軍防刺總判本鎮兵

馬之事兼本州管內觀察使事

其觀察使所掌並同府尹兼軍州事管內觀察

使同知節度使一人通判節度使事

兼州事者仍帶同知管內觀察使

副使一人節度判官一人掌紀綱節鎮衆務僉判兵馬

之事兼制兵刑工案事觀察判官一人掌紀綱觀察衆

務僉判吏戶禮案事通檢推排簿籍又有知法司獄

哈斯罕路扶餘路托里路索雲路四節鎮省觀察判

官而無州事

又諸府節鎮錄事司掌平理獄訟警察別部與警巡使同錄事判官各一人

諸部族節度使使一人統制各部鎮撫諸軍餘同節度副使判官知法各一人

元明俱不設節度使

遼諸州團練使司官有使副使判官

東京道有安州團練使又諸軍都團練使俱設官同上漢

軍都團練使司

設官未詳

諸州防禦使司官有使副使判官

東京道鎮海一府廣冀二州及衍州安廣軍置防禦使司凡四

諸州刺史官有州刺史同知州事錄事叅軍

上京道烏降聖維防招五州 東京道穆賀盧鐵宗

耀嬪遼西康宗海北巖集祺遂韓銀安遠威清雍湖
渤郢銅涑率賓定理德爾吉麓荆勝順化連肅烏三

十七州 中京道恩惠榆澤北安潭松山安德黔嚴
隰遷潤十三州 南京道順檀涿易薊景灤營八州
西京道宏德寧邊歸化可汗儒武東勝八州置刺
史凡七十一

觀察使以下俱有學官詳各學校官門

金諸防禦州防禦使一人掌防捍不虞禦制盜賊

餘同府尹

同知防禦使一人掌通判防禦使事判官一人掌簽判
州事又有專掌通檢推排簿籍知法又州教授一人又

有司軍及軍轄兼巡捕使

諸刺史州刺史一人掌同府尹兼治州事同知一人通判州事判官一人簽判州事又有專掌通檢推排簿籍司軍又有知法一人及軍轄兼巡捕使

及諸防刺州司候司司候司判各一人

臣等謹按宣宗紀貞祐元年十月元兵下涿州設京城鎮撫彈壓官至興定二年四月詔河南路行總管府節鎮以上官充宣差捕盜使以防禦刺史

長貳官及世襲猛安之才武者為之副又命濮王
府尉完顏毛良虎為宣差提控以巡督之九月設
隨處行六部官以京府節鎮長官充尚書次侍郎
郎中員外郎佛呼長官充侍郎次郎中員外郎主
事勾當官聽所屬任使州府官並充勸農事防刺
長官及京府節鎮同知以下充副使皆百官志所
謂一時之制也

元防禦使

至正十七年准山東分省咨團結義兵每州添設州判一人每縣添設主簿一人詔有司正官俱兼防禦使事聽宣慰司節制

臣等謹按元雖不設團練使而以團結義兵添官則名異而實同矣

明不設防禦使團練使諸州刺史

臣等謹按日知錄謂漢之刺史猶今之巡按御史魏晉以下之刺史猶今之總督隋以後之刺史猶

今之知府及直隸知州蓋隋有時改郡為州則謂之刺史有時改州為郡則謂之太守又引新唐書地理志載唐興高祖改郡為州太守為刺史以証之由是明雖不設諸州刺史而凡為知州者類皆以刺史稱之矣

諸安撫司

招討宣慰等官附

宋寧宗慶元二年詔利州西路安撫司於興州置司令都統制兼

五年臣僚言遴選帥才除嘗任執政外兩制從官必
曾經作郡庶官必曾任憲漕實有治績者從之

臣等謹按職官志又云紹興五年令襄陽守臣湖

北帥司各帶經畧安撫使後罷惟二廣如故

招討使招

撫使宣諭使撫諭使鎮撫使等官具詳馬端臨考

遼北面邊防官西南面安撫使司官有使

又西南面都招討司官有使太祖神冊元年置

亦曰西南

路招討使西南面五押招討司官有五押招討大將軍西

南路巡察司官有西南路巡察將軍

又有西南
巡邏官

又西北路招討使司官有知西北路招討事有監軍
又有西路招討使司西北路戍長司九水諸夷安撫
使

南面邊防官易州安撫使司

初名易州飛狐招安使統和二十三年改為安撫使
司又道宗咸雍四年改易州飛狐兵馬司為易州安
撫司

又有易州飛狐招撫司西南面招安使司

以上互詳於後各路將官門

又有東京安撫使司安撫使雲州宣諭招撫使司

管內

使二人統和四年韓毗哥那抱質為雲州管內宣諭招撫使

金安撫司掌鎮撫人民譏察邊防軍旅審錄重刑事官有使副使判官等後以按察司官兼領之

安撫司本宣撫司承安三年改置

詳按察使司

泰和六年

置陝西路宣撫使節制陝西右監軍右都監兵馬公

事八年改陝西宣撫司為安撫司山東東西大名河北東西河東南北遼東陝西咸平隆安上京肇州北京凡十處置司官有使副使

西北西南東北三路招討司招懷降附征討携離使一人副招討使二人判官一人紀綱職務簽判司事勘事官一人

西北路增一人

知事一人知法一人

女直漢人各一惟東北路不置漢人

知法

諸明安掌修理軍務訓練武藝勸課農桑餘同防禦

所隸諸穆昆掌撫輯軍戶訓練武藝惟不管常平倉
餘同縣令

臣等謹案百官志上京東京等路安撫司掌鎮撫
譏察仍專管明安穆昆教習武藝及令本土純愿
風俗不致改易

互見按察使司

又以諸明安列於三處招

討司後故附於此

元宣慰使司掌軍民之務分道以總郡縣每司使三人
同知副使經歷都事照磨兼架閣管勾各一人凡六道

行省有政令則布於下郡縣有請則為達於省有邊陲
軍旅之事則兼都元帥府其次則止為元帥府

詳都元帥府

其在遠服又有招討安撫宣撫等使

山東東西道

益都路置

河東山西道

大同路置

淮東道

揚州置

浙

東道

虔元路置

荆湖北道

中興路置

湖南道

天臨路置

順帝至元元年湖南道宣慰司兼都元帥府總領所

轄路分鎮守萬戶府軍馬六年改立山東東西道宣

慰使司都元帥府專掌開設屯田屯駐軍馬至正十

一年荆湖北道宣慰使司兼都元帥府十二年浙西
宣慰司添設使同知各一人都事二人

宣慰使司都元帥府使三人同知副使經歷知事各二
人照磨兼架閣管勾一人

廣東道

廣州置

大理金齒等處

二府設官如上

蒙慶等處

上一府使二人同知副使各一人經歷都事亦減一人

廣西兩江道

靜江路置

海北海南道

福建道

八番順元等處

察罕淖

爾等處

上五府宣慰使都元帥三人副都元帥兼都元帥事各二人餘同上

順帝至元四年十二月置邦牙等處宣慰使司都元帥府先是以緬地處雲南極邊就立其酋長為帥三年一貢方物至是來貢故改立官府以獎異之至正三年七月遂定置永昌等處宣慰使司都元帥府使三人同知副使各二人首領經歷知事照磨各一人十五年二月置淮東等處宣慰使司都元帥府統率濠泗義兵萬戶府并洪澤等處義兵招誘富民出丁壯五千名者為萬戶五百名者為千戶一百名者為

百戶降宣勅牌面與之命置司於泗州天長縣十二月置興元等處宣慰使司都元帥府十六年九月置江州等處宣慰使司都元帥府廷授佐貳僚屬命江西行省平章政事道通和尼齊承制署之

宣慰使兼管軍萬戶府

曲靖等路羅羅斯臨安廣西道元江等處

每府宣慰

使三人同知副使經歷各一人都事二人照磨兼管勾一人

至正十九年罷洛陽招討軍民萬戶府置河南宣慰

司

宣撫司每司達嚕噶齊宣撫各一人同知副使各二人
僉事計議經歷知事提控案牘架閣各一人

廣南西道不置副使僉事叙南等處不置僉事計議

順帝時有紹熙軍民宣撫司

至元四年置六年罷

永順宣撫司

至正十一年改永順安撫司升

平緬宣撫司

至正十五年以雲南死可伐等降置此羈縻之

臣

等謹按百官志至正五年遣官分道奉使宣撫

布宣德意詢民疾苦疎滌冤滯蠲除煩苛體察官

吏賢否明加黜陟有罪者四品以上停職申請五
品以下就便處決民間一切興利除害之事悉聽
舉行其餘必合上聞者條具入告各道使二人首
領官一人時奉使者蘇天爵其最著也詳按察使司十
七年詔以中書左丞額森布哈御史中丞成遵奉
使宣撫彰德大名廣平東昌東平曹濮等處獎勵
將帥此二事皆一時特設非常制也

安撫司每司達魯噶齊安撫使同知副使僉事經歷知

事照磨鎮撫各一人

湖廣羅番遏蠻軍四川師壁軍不置達嚕噶齊湖廣
小龍番靜蠻軍不置同知副使蘆番靜海軍不置知
事

順帝時有忠孝軍民安撫司

至正十一年革四川省所轄大奴管勾等洞長

官司立忠孝軍民府十五年詔改為安撫司

忠義軍民安撫司

至正十五年罷四川

羊母甲洞具南王洞長官司置此

盤順軍民安撫司

十五年罷盤順府置

招討司達嚕噶齊招討使經歷各一人

吐蕃喇嘛剛等處天全僭不思設官如上沿邊溪洞
索紐諸番征沔朶甘斯長河西裏管軍擔裏管軍圖
沙瑪田地各置副使一人無達嚕噶齊

至正二十年以鞏縣為招討軍民萬戶府二十六年
置嵩州軍民招討萬戶府

臣等謹按百官志宣慰等司重見疊出更多互異
今概不贅錄

長官司

屬中政院者

每司達嚕噶齊長官副長官提控案牘

都目各一人

奉元等路平涼等處開城等處甘肅寧夏等路察罕
淖爾等處凡五處各設如右延祐二年以民匠提舉
司所領地里濶遠人戶散處於政不便乃酌遠近衆
寡立長官司提領所以分理之提領所凡十奉元等
路鳳翔等處平涼寧環等處開城等處察罕淖爾等
處甘州等路肅沙等路永昌寧夏等路長城等路各
設提領等官分掌齊哩克昆地方隸各長官司

諸長官司官有達魯噶齊長官副長官

管領上都大都奉聖州長官司掌領出征軍五十有

一戶

至元十七年置

管領口子迤北長官司掌領戶計二百

有六管領隨路打捕納綿民匠長官司掌民匠一百

七十有九戶管領河間滄州等處長官司領戶計五

百四十有八管領河間臨邑等處軍民長官司掌軍

民二百有二戶

以上供至元二十一年

管領上都大都麴米等

長官司領民匠七十有九戶管領彰德等處長官司

掌民一百一十有七戶管領上都大都等處長官司
掌民二百六十有一戶管領泰安等處長官司掌民
一百有一戶管領曹州等處長官司管民一百有五

戶以上俱大德二年

又有歸德長官司

不詳所掌至治三年置

諸蠻夷長官司官有達魯噶齊長官司副長官

西南夷諸溪洞各置司達魯噶齊長官司副長官參用
其土人為之

明宣慰使司宣慰使同知副使僉事經歷司經歷都事

各一人

宣撫司宣撫使同知副使僉事經歷司經歷都事照磨
各一人

安撫司安撫使同知副使僉事各一人其屬吏目一人
招討司招討使副招討各一人其屬吏目一人
長官司長官副長官各一人其屬吏目一人

又蠻夷長官司長官副長官各一人又有蠻夷官苗
民官及千夫長副千夫長等官

欽定四庫全書

欽定續文獻通考

卷六十

五十二

職官志以上皆土官洪武七年西南諸蠻夷朝貢
多因元官授之稍與約束定征徭差發之法漸為
宣慰司者十一為招討司者一為宣撫司者十為

安撫司者十九為長官司者百七十有三其府州

縣正貳屬官或土或流

大率宣慰等司經歷皆流官府州縣佐貳多流官

皆因其俗使之附輯諸蠻謹守疆土修職貢供征調
無相撓貳有相讐者疏上聽命於天子又有番夷
都指揮使司三衛指揮使司三百八十五宣慰司

三招討司六萬戶府四千戶所四十一站七地面

七寨一

詳見兵志
衛所中

並以附寨番夷官其地

都總管府

宋徽宗崇寧四年以輔郡知州為都總管置副總管鈴

轄各一人

從尚書左僕射蔡京奏也

詳見馬端臨
考京尹門

大觀三年詔

東南帥府總管依三路都總管法靖康元年詔四道

副總管並通差文武臣

欽定四庫全書

欽定續文獻通考

卷六十

五十三

總管鈐轄司掌總治軍旅屯戍營房守禦之政令凡將兵隸屬官訓練教閱賞罰之事皆掌之守臣帶提舉兵馬巡檢都監及提轄兵甲者掌統治軍旅訓練教閱以督捕盜賊而肅清治境凡諸營各籍賞罰之

事皆掌之

餘詳馬端臨考

遼北面南京兵馬都總管府有都總管總領南面邊事總領南面軍務事總領南面戍兵等官

興宗重熙四年改南京都元帥府

互見元帥府門

又東路兵馬都總管府有都總管同知兵馬事官

南面五京都總管府各有都總管知府事同知府事

又諸軍兵馬都總管府有都總管副總管同知兵馬事

判官

百官志南面軍官又有歸聖軍都總管府不詳官

名其所隸有都指揮使司已詳指揮使門

又邊防官有義霸祥順聖五州都總管府

金諸總管府

謂府尹兼領者

都總管一人掌統諸城隍兵馬甲

伏總制府事同知都總管一人掌通判府事

惟博索路同知都總

管魚來遠軍事兵馬

副總管一人所掌與同知同總管判官一人

掌紀綱總府衆務分判兵案之事府判一人掌紀綱衆務分判戶禮案仍掌通檢推排簿籍推官一人掌同府判分判工刑案事知法一人

凡諸府置員並同惟昌嬾路無府事

諸總管府節鎮兵馬司有都指揮使等官

詳指揮使門

元大都路都總管府領府一州十有一官有達魯噶齊

二人都總管一人副達嚕噶齊同知治中判官推官經歷知事各二人提控案牘四人照磨兼管勾一人

國初為燕京路總管大興府中統五年稱中都路至元九年改號大都二十一年始置大都路總管府達嚕噶齊都總管等官二十七年升為都總管府凡本府官吏惟達嚕噶齊及總管推官專治路政其餘皆分任供需之事故又號曰供需府

其屬大都路兵馬都指揮使司有都指揮使及司獄

司等官

詳指揮使門

左右警巡二院有達魯噶齊等官

詳警

巡院

大都路提舉學校所有提舉等官

詳各學校官門

管領諸路打捕鷹房總管府

至元十七年置

官有達魯噶齊總

管副達魯噶齊副總管各一人經歷知事各一人

所屬宛平大興二縣有達魯噶齊等官

詳諸縣門

東關廂

西北南關廂三廂檢司有巡檢等官

詳鎮戍關市門

諸路總管府

至元初置二十年定十萬戶之上者為上路十萬戶之下者為下路當衝要者雖不

及十萬戶亦為上路上路達魯噶齊總管各一人兼管勸農事江

北則兼諸軍鄂囉同知治中判官各一人下路不置治

中員而同知如治中之秩餘悉同上推官二人至元二十三年

置專治刑獄下路經歷一人知事一人或二人照磨兼承

發架閣一人

其屬儒學教授一人諸路學正學錄及散府諸州教官詳諸學校官門蒙古

教授一人醫學教授一人陰陽教授一人司獄司司

獄丞各一人平準行用庫提領大使副使各一人織

造局局使副使各一人雜造局大使副使各一人府倉大使副使各一人惠民藥局提領一人稅務提領

大使副使各一人錄事司

凡路府所治置一司以掌城中戶民之事

設錄

事司候判官各一人

中統二年詔監民戶定為員數二千戶以上設官如上二千戶

以下省判官不置至元二十年置達魯噶齊一人省司候以判官兼捕盜之事典史一人若城市民少則不置司歸之倚郭縣在兩京則為警巡院獨杭州置四司後省為左右兩司

隨路諸色人匠都總管府有達魯噶齊一人總管二人同知一人副總管二人經歷知事照磨提控案牘各一

人

中統五年命招集析居放良還俗僧道等戶習諸色
匠藝立總管府以司其造作

所屬上都諸色民匠提舉司提舉同提舉副提舉吏

目各一人

至元十九年立又有金銀器盒局漆局雜
造局泥瓦局鐵局上都葫蘆局器物局研

金局鞍子局各大使副使
雲州管納色提領所提領

大都等路諸色人匠提

舉司提舉同提舉副提舉各一人

至元十
六年置

其屬

雙線
局大

小木局赫伯局管納色各提領大使副使等
官又有管銅局筋局鎖兒局裝釘局雕木局

成製提舉司達嚕嚕齊提舉同提舉副提舉吏目各

一人 上都大都貂鼠軟皮等局提領所提領二人

其屬大都軟皮局斜皮局上都軟皮局牛皮局金線
子局畫油局造局材木庫瑪瑙玉局各有大使副使

并直長等官

大都與魯提領所提領一人上都鄂囉提

領所提領同提領各一人俱掌理人匠詞訟

又有上都異樣

毛子局造局斜皮局蔚州安定等處山場採木提領
所上都隆興等路雜造鞍子局真定路雜造局珠翠

局各提領大使
副使直長等官

江淮等處財賦都總管府達嚕嚕齊總管同知各一人

副總管二人經歷知事照磨一人案牘各一人

至元十六年以宋謝太后福王所獻事產及賈似道
劉堅等田土立總管府以治之大德四年罷命有司
掌其賦天歷二年復立其賦復歸焉

其屬儲用庫一

大使副使各一人

提舉司五

揚州等處建康等處平江等處

杭州等處四財賦提舉司並設達魯噶魯提舉司各一人又有陝西等處管
舉副提舉提控案牘都目各一人

織染局三

杭州建康黃池三局各有大使副使相副

官河泊所三

詳見轉運使門

臣等謹按百官志所載總管都總管甚屬繁冗或隸兵部工部或隸樞密宣政將作徽政儲政等院俱詳見於各門茲不贅錄

明不設總管府



欽定續文獻通考卷六十